

四庫全書

集部

欽定四庫全書

宋詩紀事卷七十五

錢塘厲鶚撰

文及翁

及翁字時學號本心綿州人登進士第歷官參知政事

和賈魏公大雪遺潛安撫侍郎

身遊廊廡意山林六出花開一片心平地尺書叨載史
瞻天班賀齒諸任屢豐歲事嘗如昔太素風光直到今

收斂神功效晴景白河半夜掃層陰

咸淳臨安志

山中夜坐

悠悠天地間草木獻竒怪投老一蒲團山中大自在

天地

間集

陳存

存咸淳中官侍郎

和太師平章魏國賈公大雪遺潛侍郎之作

先臘催開萬玉林人心悅處即天心山河洞徹重瞳遠

宮闕高寒一柱任瑞應崆峒知有日塵清洄曲在斯今
神功變化無留迹便放陽春捲積陰

咸淳臨安志

曹元發

元發咸淳間官侍郎

和太師平章魏國賈公大雪遺潛侍郎

乾坤滿眼盡琪林擊玉詩傳魏國心寫琰已增天府重
掌冰匪媿地官任三千界內清無際數十年來瑞獨今
喜雪未幾還喜雨老農歌舞愛春陰

咸淳臨安志

曹 邈

邈字擇可號松山御前應制又為賈師憲之客
寄豫章詩社諸君子

向來心事劍能知曾結仙人汗漫期南浦看花春載酒
西園刻燭夜吟詩淒涼風月隨殘夢零落江湖似斷碁
千里洪崖秋水隔暮雲無處說相思

詩林萬選

南徐懷古呈吳履齋

匹馬來逢塞草秋淮雲一片隔神州黃昏燈火西津渡

白晝風烟北固樓猶有斷碑知晉宋誰將遺石問孫劉
天荒地老英雄盡落日長江萬古愁

詩家鼎鑪

何夢桂

夢桂字巖叟初名應祈字申甫嚴之淳安人咸
淳乙丑廷對第三人授台州軍事判官歷仕至
大理寺大卿引疾去至元累徵不起築室小西
源有潛齋集

擬古

杞國天柱傾哀我鞠子疾蒼鵝飛冲天妖星大如斗簾
下玉牀移山摧失鰲負河南帛遺黎原野骨未朽北邙
望孤陵古木叫猿狖朔風吹塵沙天寒薄翠袖南雲山
萬重去去莫回首

寄王南叟

歌盡驪駒落日寒相思無處問平安客愁白髮三千丈
世路青泥百八盤夜月梅花頻入夢秋風菰米強加餐
高山如故絲弦在嬾向旁人取次彈

哭橋陵

百年弓劍入橋陵豈料三泉化劫塵
空有魚燈照荒土忍將玉軸問遺民
蒼梧日落啼丹雀金粟雲深臥石麟
寒食家家上丘冢六宗孟飯屬何人

弔維揚瓊花

雙鶴揚州問故家一樽后土弔瓊花
人間驚破霓裳舞天上徵回玉女車
死蘂記曾霑雨露落英誓言不污泥沙
後庭玉樹今誰主猶得臺城葬麗華

己卯春過西湖和諸公

白髮星星紗帽烏怕隨年少過西湖清明上冢行人少
寒食開門宮使無半世行藏隨杖屨百年悲樂寄樽壺
歸來第五橋邊路半樹殘陽噪畢逋

題川無竭寄傲窗

南山有路滑如苔多少人從半嶺回不是老僧空傲世

世人自不上山來

以上潛齋集

贈畱中齋歸

昆明灰劫化塵縑
夢覺功名黍一炊
鍾子未甘南操改
庾公空作北朝悲
歸來眼底吳山在
別後心期浙水知
白髮門生羞未死
青衫留得裏遺尸

庶齋老學叢談何探花夢桂雷中齋知舉日及第雷歸贈詩云云按雷夢炎宋大魁降元

黃公紹

公紹字直翁邵武人咸淳元年進士隱居樵溪
有在軒集

競渡權歌

望湖天望湖天綠楊深處鼓鼙鼙好是年年三二月湖
邊日日看划船

鬪輕橈鬪輕橈雪中花卷櫂聲搖天與玻璃三萬頃儘
教看得幾吳舸

櫂如飛櫂如飛水中萬鼓起潛螭最是玉蓮堂上好躍
來奪錦看吳兒

建雲旂建雲旂土風到處總相猶朝了霍山朝岳帝十
分打扮是杭州

蹋青青蹋青青西泠橋畔草連汀撲得龍船兒一對畫

闌倚徧看遊人

在軒集

夢梁錄二月初八日錢塘門外霍山路有神曰
祠山真君誕聖之辰其日龍舟六隻戲于湖中
其舟俱裝十太尉七聖二郎神神鬼快行錦體
浪子黃胖雜以鮮色旗傘花籃鬧竿鼓吹之類
其餘皆簪大花捲脚帽子紅綠戲衫執棹行舟
帥守出城往一清堂彈壓令立標竿于湖中挂
錦綵銀旆官楮有一小節級披黃衫頂青巾戴
大花插孔雀尾乘小舟抵湖堂橫節杖聲喏取
指揮以舟回朝諸龍舟小綵旗招之俱鳴鑼擊
鼓分兩勢划棹旋轉遠列成行再以旗招之龍
舟並進者二又以旗招之其龍舟遠列成行而
先進者得捷取標賞聲喏而退餘者以錢酒支

稿也

史蒙卿

蒙卿字景正鄞人司封郎中彌鞏之孫咸淳元年進士江陰軍教授宋亡不仕自號靜清處士

感事

宮花攢曉日仙鶴下雲端自是傷心極那能著眼看風沙兩宮恨烟草八陵寒一掬孤臣淚秋霖對不乾

有感

途窮那免哭哭罷一高歌白日催年急青山閱世多浮
生從潦倒遺恨不消磨何許南來雁殷勤掠暝過

以上
吳禮

部詩話

史唐卿

唐卿與兄蒙卿同登咸淳元年進士

鳳鳴洞

何年雷斧鑿山裂千尺蒼崖瀉飛雪青天半夜玉簫寒

喚醒幽人弄明月

甬上耆舊集

汪宗臣

宗臣字公輔婺源人咸淳二年兩中亞選入元
不仕有紫巖集

稼穡

稼穡病多雨蕪菁種待晴壘空驚燕去池淨視鷗明野
碓鳴秋杵風簷響夜箏山中涼意早蚊蚋已無聲

十一月宿於潛

蜂迷蜜甕木絲香蟻泛花甕碧玉漿縣僻人稀寒日晚

古松樛翠出危墻

以上新安文獻志

范師孔

師孔字學大崇安人咸淳丁卯恩薦充講書有
畫餅彙

高樓

高樓高登天美人美如玉美人坐高樓更彈天上曲飛
聲落人間誰不注耳目安知妾此心長恐晝夜促莫羨
高樓高莫羨美女美樓頭瞻明月樓下看流水月明圓

易缺水流去如駛獨愛山中蘭幽香抱枝死

武夷山

幾與溪山絕世緣重來猿鳥只依然懸崖野瀑飄成雪
近午嵐霏暗盡天水尚未疏須識禹山如深入定逢仙
洞中石鼎烹雲處此夜還來借榻眠

以上四朝詩

鮑壽孫

壽孫字子壽新安人咸淳丁卯領江東漕舉

句

我無孤雁向君有倚樓詩
一樽浮大白千里策飛黃
但喜親庭健何悲客路長
少日從游今老矣殘冬話

別各淒然

方回桐江集

陳文龍

文龍字志忠一字君貴興化軍人咸淳四年廷
對第一累遷參知政事元兵至杭文龍乞歸養
益王立于福州復拜參知政事充閩廣宣撫使
即興化軍開閩元兵攻城通判曹澄孫降俘至

杭餓死計聞行朝謚忠肅

三柳軒雜識陳文龍度宗朝狀元也德祐末歸守本州北兵入閩不屈生縛之至杭病卒于杭之貓兒橋巷初文龍入太學累試不利太學守土之神岳侯也一夕夢神請交代意必老死于太學常悒悒不樂既而赴廷對第一任官日顯前夢不復記矣及守鄉州又夢神通書閱書前面曰交代後書年月至元心甚慢之未幾國亡城陷家殘身俘至杭幽于太學之側

元兵俘至合沙詩寄仲子

斗壘孤危勢不支書生守志定難移自經溝瀆非吾志
臣死封疆是此時須信累囚堪釁鼓未聞烈士樹降旗

一門百指淪胥盡唯有丹衷天地知

興化府志

李 瓘

瓘興化軍人咸淳戊辰進士

挂冠詩

人言學古思入官我謂學易而官難平生透出夢覺關
本來面目只儒酸吾親不俟若為懽不如歸去臥林間
殿前三策罄忠肝多謝皇恩天地寬戲衫卸了白衣還
扁舟飛過子陵灘前修亦有逋與搏聖世許之俱寬閒

何物种放太厚顏山鬼移文伐其姦此行無復出閩山
休音息影谷之盤今朝醺酒酌雩壇便向錢塘門挂冠

古杭雜記詩集度宗戊辰龍飛狀元興化陳文龍同郡李權太學貫道齋上舍係第三甲正奏名于唱名之後乞以本身官致仕恩例盡以回贈父母上書畢辭先聖及三魁同舍出錢塘門脫綠袍挂于門之上泛舟而去時三魁同舍皆送別權有詩云云

童潮

潮彭澤人咸淳進士官工部尚書

小孤山

長江萬里來一砥中流峙巨浸沒根深孤峰插漢起倒
回三峽流獨據九江水真是海門關波濤險莫比

西江詩話

汪薦

薦一名韶字東美黔人咸淳四年進士

演雅

布穀不稼不穡巧婦無褐無衣提壺不可挹酒絡緯匪

來買絲

後村題跋

句

秋風駢臥棘春雨燕巢林

後村題跋汪君此句感時傷事有足悲感

胡次焱

次焱字濟鼎號梅巖婺源人咸淳四年進士授
湖口縣主簿改貴池縣尉德祐乙亥微服歸教
授鄉里以終

媒問嫠

媒問嫠汝何傷汝為國秀時辛苦事蠶桑個瑟順為正

婉婉禮自將笥中有練裙衣上無明璫貧女古難嫁賣
犬辦資裝中年得夫壻憧憧拜姑嫜肅容采蘋藻洗手
供羹湯良人正少年相期家道昌良緣天所妒夫壻奄
云亡自從夫壻亡十年守空房素帷代錦幃苦席易牙
牀孤眠耿夜半單立黯昏黃熒熒影徘徊鞅鞅情彷徨
皓月照孤衾暴雨頽垣牆獨寐誰呼喚獨語誰交相如
凌空失翼如涉川無梁嫠來吾語女琴瑟貴更張汝篋
既單薄汝門復淒涼汝寒何以衣汝飢何以糧紡績終

難給春及勞欲僵死者不復起生者宜自詳鄰有美丈夫
顛顛更昂昂牛羊量用谷金玉堆滿堂畫梁青瑣闥
珠簾璣璣廂瑤戶金彈丸寶鞍青絲韁旌旗明晚霞劔
戟磨秋霜奴隸厭綺紈犬貓棄餼餽門下粲珠履庭前
沸笙簧出則專城居入則侍明光一呼千夫諾一指萬
夫張一笑生羽翼一怒起鋒芒吾慕者蹇脩與汝解佩
纒以此窈窕婦配彼駟僮郎花樹戲蛺蝶蓮浦浴鴛鴦
無煩賦藕花且喜華枯楊何妨鸞舞鏡應被鳳求凰人

無百歲人倏忽如風狂莫將泡影身徒置冰炭腸死後
留名節身朽魂茫茫生前受富貴志得意洋洋人生行
樂爾二者試裁量蔬食不日給孰與飫膏粱荆釵不自
謀孰與雲霞裳年滔滔不反貌駸駸已蒼敗基湏換局
作戲且逢場文君慕相如恢女喚江郎有髮可重結有
耳何自戕試問東夷子何如聲伯孃信書不如無未必
有共姜鬼妻變人婦母作老死孀

發答媒

發谷媒妾自憐妾家貧如洗妾貌妝不妍中年方擇配
幸逢夫婿賢蓋橋凝仙會紅葉開良緣俯以奉箕帚仰
焉供豆籩粵從定六禮穩圖偕百年渠疑有家願倏惟
中道捐城崩哭啾啾竹斑淚濺濺空房照明月幽隴淒
寒煙禽鳥喧墓門魄降魂翩翩蚰蟻滿窗戶心結目涓
涓寮室昔華屋埋玉今荒阡恨不即同穴何忍續斷弦
翻思合卺初參透老婆禪如魚水游泳如鳶蘿纏綿奈
何死生濶泛泛水中船綢繆為夫婦反覆如市廛徒貽

陽華醜寧免柳絮顛妾頗親筆硯亦嘗閱簡編女不踐
二庭婦不再移天陶嬰寡鵠吟衛妻孤燕篇或刑耳自
誓或斷髮自全或劓鼻偃蹇或毀面迎遭吾足幸可剛
吾臂不可牽卓卓節操立表表鳳孤騫藐茲未亡人有
意奉周全媒雖憫妾寡媒適重妾愆妾命春葉薄妾心
頑石堅栖栖謀尺布豈不羨罽羶皇皇圖斗粟豈不思
葷羶胠手任春汲孰與奴婢千鞠躬踰衡茅孰與疏綺
便枯菱欣回春缺月喜再圓世誰不此樂妾意獨不然

理義自有閑物欲常無厭三少穢難洗五嫁醜莫鎬浮
榮瞥似電遺臭流如川媒言頗喋喋媒意遽拳拳之死
矢靡他斯言當真詮文姬殊妖媚易安亦嬋娟失身再
事人彤管無取焉節義日以頽文章何足詮王母有差
事青鳥信頻傳母乃墮人慾反以汙天仙嫦娥豈不嫁
空抱老金蟾所以廣寒宮萬古清鑒懸寧貧任勞漉寧
賤受磨研寧凍如寒蠅寧餓如飢鳶終不以快樂而易
此憂煎井底水不汲山頭石不遷再拜謝媒妁歸來雙

淚連什襲藏破鏡他年會黃泉

新安文獻志右婺媒荅問宋鄉先生胡公次焱
濟鼎之所作也先生登宋咸淳四年第授迎功
郎江州湖口縣主簿以母老改授池州貴池尉
德祐乙亥天兵將至池州都統制張林潛納款
請以城降先生奉母亡歸教授鄉里或勸之仕
先生賦是詩以見意大德十年以壽終于家後
三十二年復為至元之三年文自黃竹入郡其
孫師中適在郡中出是詩俾文書之嗚呼讀柳
子河間傳知邪之得以敗正讀先生是詩知正
之所以勝邪天理之在人心猶日月之在天也
可以缺蝕而不可以喪其光明若先生之心孰
得而缺蝕之哉雖與日月爭光可也鄉後學程
文謹記

梁棟

棟字隆吉其先湘州人後遷居鎮江登咸淳四年進士選寶應簿調錢塘仁和尉宋亡弟柱字中砥入茅山從老氏學棟往依焉乙巳無疾卒有梁隆吉詩鈔

四禽言

脫卻布袴貧家能有幾尺布寒機剪盡無可裁可人不來廉叔度脫卻布袴

不如歸去錦官宮殿迷烟樹天津橋上兩三聲叫破中原無住處不如歸去

提葫蘆今年酒賤頻頻沽衆人皆醉我亦醉哀哉誰問醒三閭提葫蘆

行不得也哥哥湖南湖北秋水多九疑山前叫虞舜奈此乾坤無路何行不得也哥哥

山房隨筆云寓意甚遠諸作不及

金陵廢宮

六代俄然又一唐青山坐閱幾興亡心知江左非王業
口說中原是帝鄉落日有時登北固春風吹夢過錢塘
荆墳檜宅依然在留與烏衣話短長

金陵三遷有感

憔悴城南短李紳多情烏帽染黃塵讀書不了平生事
閱世空存後死身落日江山宜喚酒西風天地正愁人
任他蜂蝶黃花老明月園林是小春

送李北山歸建康

人生無百年胡為在遠道遊子歸故鄉王孫怨芳草有
田歸去來無田歸亦好

以上梁隆吉詩鈔

登大茅峯

杖藜絕頂窮追尋青山世路爭嶮嶇碧雲遮斷天外眼
春風吹老人間心大君上天寶劍化小龍入海明珠沉
無人更守元帝鼎有客欲問秦皇金巔崖誰念受辛苦
古洞未易潛幽深神光不破幽暗惱山鬼空作離騷吟
我來俯仰一慷慨山川良昔人民今安得長松撐日月

華陽世界收層陰長嘯一聲下山去草木為我留清音

至正金陵新志

至正直記遺編宋末士人梁隆吉有詩名以其弟中砥柱為黃冠師三茅山嘗往還一日登大茅峯題壁賦長句有黃冠訴于句容縣以為訕謗朝廷行省聞之都省收梁于獄禮部免罪放還嘗觀其詩集云云其意亦可悲矣

哀毘陵

德祐元年元兵攻常州城破知州事姚訔統制王安節等死之

荆溪水腥泊船早落日無人行古道髑髏有眼不識春
東風吹出青青草荒基猶認是人家敗柵曾將當城堡

當時壓境兵百萬不脫鞞火堪蹴倒短兵相接逾四旬
毒手尊拳日攻討內儲外援兩消沈一縷人心堅自保
孤臣守土輕性命赤子效死塗肝腦朝廷有爵媿降附
幽壤無恩澤枯槁願箋司命錄英雄收拾忠魂昇穹昊
毘陵忠義錄

送存書記

一聲兩聲松子落一片兩片楓葉飛夕陽在山新月上
道人相伴一僧歸

清河書畫舫

句

千枝守紅死一點反魂啼

雪中見山茶

癡兒嬌勿啼不久當

澄霽

暴雨

家貧忽暴富菜種一十七癡兒不解事問我何

從得於義苟有違吾寧飢不食

賦疏

至正直記遺編

莫崙

崙字子山號兩山江都人寓家丹徒咸淳四年

進士入元不仕

癸辛雜識梁棟陸吉鎮江人登第授尉與莫子山甚稔一日有客訪子山雷飲偶不及棟棟憾

之遂告子山作詩有識訕語官捕子山入獄久之得脫而歸未幾病死余挽之詩云奏邸獄成杯酒裏烏臺禍起一詩間紀其實也
湛困靜語莫子山暇日山行過一寺頗有泉石之勝因誦唐人絕句以快喜之云終日昏昏醉夢間忽聞春盡強登山因過竹院逢僧話又得浮生半日閑及叩其主僧庸僧也與語畧不相入屢欲舍去僧意以為檀施苛留作午供鬱鬱久之殆不自堪因索筆以前語錯綜其詞書于壁曰又得浮生半日閑忽聞春盡強登山因過竹院逢僧話終日昏昏醉夢間

傷丁氏故基題一絕于太虛堂

疎雨斑斑灑葉舟前山喚客作清游芳華消歇春歸後

野草荒田一片愁

山房隨筆

張鎮孫

鎮孫字鼎卿南海人咸淳七年進士第一通判

婺州

謝恩詩

當宁宵衣務得賢
草茅何足副詳延
天人要語垂清問
仁敬陳言上奏篇
媿乏謀猷裨乙覽
忽驚姓字首臚傳
乾坤大德知難報
誓秉孤忠鐵石堅

雙槐歲鈔

林一龍

一龍字景雲永嘉人咸淳辛未進士官至史館
檢閱時稱為石室先生

山中夜坐

寒灘遠嘶月遺響到巖壁悠悠千古心悄悄一卷易燈
微夜氣分星冷山露滴危坐獨何為人間睡方黑

十四夜觀月張氏樓

只隔中秋一夕間蟾光應未少清寒時人不會盈虛意

不到團圓不肖看

以上東甌詩集

厲元吉

元吉字无咎號半村餘姚人咸淳辛未進士仕
為烏程尉德祐末歸隱從山至元中訪求前宋
故臣元吉遯跡湖海白首始歸有半村集

黃宗義云半村出尉烏程謝疊山送之詩云十
二街頭三尺雪駿馬健行如跛鼃生懷故人屬
半村拂袖前行何勇決疊山居士強欲吟凍筆
如推硯欲裂京國青衫十載交欲言不言情哽
咽願君勿作繞指柔願君勿作在鑛鐵甘雨幽
遐冤草甦清風宇宙貪泉竭循良寧困聖明時

王燭光華待調燮疊山詩文零落無幾余從屬
氏子孫見其墨跡如新

雨過

漠漠輕雲過野墻
新楓矮柏色蒼蒼
平田鶴迹畱殘雨
深塢鸚聲帶夕陽

句

免冠思脫三塗難吐舌甘從五鼎烹

吐鐵
逸詩

以上姚江

趙潛

潛字元晉號冰壺忠靖公蔡之子咸淳中沿江

制置使知建寧府北兵至其弟淮被執死于瓜
洲潛自京口遷金陵棄家南徙不返死葬海旁

山上

焦山

丹石無光古刹存蘆沙漁鼓闕朝昏江淮門戶天分合

日月軒窗海吐吞沙足半沈曾瘞鶴雲腰中斷闕呼援

丁寧為我留住佳處茅屋三間護竹根

焦山刻石云頑石為山出色冰壺欲援東坡故事為我佳處留茅菴因說偈言請師作證咸淳

壬申九月

林景怡

景怡字德和號曉山溫州平陽人霽山之兄

曉起

天雞弄喔咿殘星在斜漢整衣出幽扉山城漏初斷微
微水風生冉冉田露散此時遊葛天淡然空百羨海色
上寒梢漸識梅花面

天地間集

林景熙

景熙字德陽號霽山溫州平陽人咸淳辛未工
舍釋褐授泉州教授歷禮部架閣轉從政郎宋
亡不出與王脩竹鄭樸翁胡天放輩尋歲晏之
盟徃來吳越庚戌卒于家有白石樵唱

徐沁金華游錄注云嘉木揚喇勒智發陵事諸書
紀載歲月不同按元史世祖至元二十一年九月
丙申以江南總攝嘉木揚喇勒智發宋陵冢所收
金銀寶器修天衣寺又按宋文憲書穆陵遺詔事
及丘文莊續資治通鑑皆云至元二十一年甲
申僧嗣占妙高上言欲毀宋會稽諸陵江南總
統嘉木揚喇勒智與丞相僧格表裏為奸明年乙
酉正月奏請如三僧言蓋其謀始于甲申而成于

乙酉與周草窗密癸辛雜識年月正同是時會稽唐玉潛珏永嘉林景熙德陽鄭宗仁樸翁與臯羽咸主王監薄家協謀收掩陵骨故別玉潛作冬青樹引以紀其事而景熙荅臯羽詩亦有夜夢繞句越落日冬青枝豈非諸公共事之明徵乎彭山李本以臯羽引中有白衣種年星在尾之句謂與羅雲溪有開唐義士傳歲次戊寅之說相合善乎彭瑋解之曰星在尾者寅月也此即乙酉正月耳

鴉案鄭明德遂昌雜錄云當發陵時林景熙故為乞者背竹籬挾竹夾遇物夾投籬中潛鑄金牌繫腰間賄西僧求得高孝兩陵骨貯兩函葬東嘉故夢中作詩有雙匣親傳竺國經之句六陵遺骨癸辛雜識輟耕錄俱云葬蘭亭若云高孝兩陵林攜葬東嘉則詩中所云水到蘭亭轉嗚咽不知真帖落誰家又何謂耶當以周草窗

陶南村所紀為是而景熙則共事之人也夢中詩係唐玉潛作云景熙作者非

商婦吟

寓思君之意

良人滄海上孤帆
渺何之十年音信隔
安否不得知長憶
相送處缺月隨我
歸月缺有圓夜人
去無回期回期儻
終有白首寧怨遲
寒蠶苦相弔青燈
鑿孤幃妾身不出
幃妾夢萬里馳

鄭宗仁會宿山中

宗仁樸翁也號初心平陽焦下人太學釋褐出身仕至國子學

正

挑燈懷舊夢移席近春泉共話忽深夜相看非少年斗
垂天末樹燐出雨餘田亦有茅簷下飯牛人未眠

獨夜

客鬢雙蓬老拾遺一燈明滅酒醒時百年回首忽成夢
萬竅有聲皆是詩殘夜月枝烏未穩故鄉水草雁多飢
袂衣初試新霜冷欲折黃花寄所思

寄林編修

名千之字能一平陽人

大雅凋零尚此翁醉鄉一笑寄無功衣冠洛社浮雲散

弓劍橋山落照空東魯有詩藏古壁西湖無樹挽春風
巾車莫過青華北城角吹愁送暮鴻

曉意

僧鐘覺曙鳥紛飛弄林光宿雲漸離石我起開秋房南
山忽入几相對各老蒼我老幾何年山曾見鴻荒流泉
送日月危石支興亡問山山無言啼猿起前岡

秋夜

片月相隨過竹居風生荷葉酒醒初窗扉半掩秋蟲急

猶有殘燈守故書

新春

衰顏憑酒潤故國得春新兵革兒童長風霜天地仁草
心懸落日柳眼看行人擾擾紅塵者知誰效角巾

荅鄭卽翁

初陽蒙霧出林遲貧病雖兼氣不衰老愛歸田追靖節
狂思入海訪安期春風門巷楊花後舊國山河杜宇時
一種閒愁無著處酒醒重讀寄來詩

山窗新糊有故朝封事橐閱之有感

偶伴孤雲宿嶺東
四山欲雪地爐紅
何人一紙防秋疏
卻與山窗障北風

酬謝臯父見寄

入山采芝薇
豺虎據我丘
入海尋蓬萊
鯨鯢掀我舟
山海兩有礙
獨立凝遠愁
美人渺天西
瑤音寄青羽
自言招客星
寒川釣煙雨
風雅一手提
學士屢滿戶
行行古臺上
仰天哭所思
餘哀散林木
此意誰能知
夜夢繞句

越落日冬青枝

重過虎林

虎林山在錢塘舊治北半里亦曰武林今為郡稱

漠漠江湖夢蕭蕭禾黍秋清笳吹落日白髮過西州池
酒神龍逝山空老鳳愁唯餘關外水寂莫自東流

故宮

驚風吹雨過歷歷大槐蹤王氣銷南渡僧坊聚北宗烟
深凝碧樹草沒景陽鐘愁見花甌月荒秋咽亂蛩

飛來峯

在武林

何年移竺國秀色發稜層清極不知夏虛中欲悟僧樹
幽嵐氣重泉落乳花凝猶憶烹茶處間來語葛藤

京口月夕書懷

山風吹酒醒秋入夜燈涼萬事已華髮百年多異鄉遠
城江氣白高樹月痕蒼忽憶凭樓處淮天雁叫霜

宋武帝居今為壽丘寺

青衣夢破滿林烟一擲乾坤亦偶然僧屋翠微看月上
江山猶似永初年

石翁嫗

在丹陽

東艾楚俗愚鑄金秦民怖何年斲雲根偶立此翁嫗千
春衣莓苔偕老食風露世人輕結髮覆水或旦暮乃習
無情緣永與天壤固停舟一訪古久欲祛此錮父老向
我言曾是梁朝墓衣冠化黃土古丘亦成路當年殉金
棺茲物獨如故閱世如過客興亡了不悟時借牛礪角
敲火戲童豎

立春郊行次唐玉潛

越州人

道人清事飯溪蔬無酒閒愁已破除
五夜雪聲梅角底
一春煙景竹筇初園林芳信愁醒
蜨田野豐年入夢魚
冰下流泉清老耳東風先已到郊居

夢回

夢回荒館月籠秋何處碁聲喚客愁
深夜無風蓮葉響
水寒更有未眠鷗

冬青花

冬青一名女貞木一名萬年枝漢宮嘗植
後世因之宋諸陵亦多植此木

冬青花花時一日腸九折隔江風雨清
影空五月深山

護微雪石根雲氣龍所藏尋常螻蟻不敢穴移來此種
非人間曾識萬年觴底月蜀魂飛繞百鳥臣夜半一聲
山竹裂

送春

蜀魄聲聲訴綠陰誰家門巷落花深游絲不繫春暉住
愁絕天涯寸草心

以上白石樵唱

邵桂子

桂子字德芳淳安人咸淳七年進士教授處州

棄官寓家松江有雪舟脞橐孫亨貞知名

次韻方虛谷遷居

家住千峯落照邊移家三泖白鷗前東鄰舊日秦侯隱
西路新巢衛叟還當日釣游頻入夢何時婚嫁送歸田
會須共跨青溪鶴點易寒窗伴老仙

嚴州府志

蔬屋詩為曹雲西作

草菜可食總名曰蔬品題有譜樹藝有書衡縱町疇周
繞屋廬繚以樊垣經以瀆渠晨出抱甕夕歸荷鋤有蔓

必得有蝗必驅風披雨沐日烜露濡耨甲怒生嘉苗蔚
敷芥薑杞菊韭薤蒜葫薇蕨藜藿瓜瓠匏楮雞桑鵝
擇龍椽魚馬齒鹿角鼠尾虎鬚薯蕷蔓菁杜蘅靡蕪茵
陳莪蘿芫蘭茹蘆赤莧銀茄翠苻墨苽酸漿辣焯甘薺
苦茶庖人調脯園丁拮据錡釜鬻煤筐茗貯儲椒橙內
交醞醢效劬以芘以湘可茹可殖惟昔仲尼瓜祭齋如
飲水曲肱其樂只且召南蘋藻韓奕筍蒲知味美黃咬
根歎胡葵蓼飶顛蔥韭厭徐火芋明瓚山茵接輿庾郎

三種石生一孟劉參玉版蘇傳冰壺巢字元修鮒姓豆
盧菘羔抱孫蹲鴟將雛絲滑露葵練淨土酥野薺餛飩
水苔脯膾餅炊菠蒺鮓釀葵蘆胡麻饋鰻罌粟醍醐萍
蘆西晉尊羹東吳片擷泥坊藤采豐湖沼止有繁江漢
有萋岡有常泉洲有接余雁門天花黃河磨菇大宛苜
蓿太華芙蓉環滁野藪盤谷山茹地饒所產天茁此徒
菲封是采口腹以娛落英未莎初篁未菸霜根旋挑露
葉半舒烹泉石鼎養火地爐色炫七箸香浮拌杓氣含

土膏味逾天廚肥生華池響鳴輔車商顏飢解文園渴
甦前招翹生後引酪奴饌非羶葷餉非苞苴園無羊踏
壤有鼠餘彼哉肉食俎列豢芻心炙椎牛頂鬻割猪春
羔秋麝冬鱸夏胸猩脣豹胎麋鸚蟹胥緇席解鼈銀絲
鱠鱸羊尾截肪錦襖脫膚山彀雉兔澤羞雁鳧北饌潼
酪南烹鼃蜍嗜鼠則鴟甘帶則蛆乃笑鄭老爛蒸瓠虀
乃笑坡翁夢餐雞蘇屬厭饕餮飽死侏儒語以蔬味能
知否乎予雅嗜之日不可無乃顏茲屋羞供是須寧蔬

而癯母肉而腴易牙司味敢告膳夫

餞魏州判鵬舉

松下吟哦幾唱酬，卻攜螃蟹餞監州。
穩挑書擔去環碧，頻寄詩筒來雪舟。
異姓弟兄千里月，故山泉石一天秋。

葛峯隱者如相問，為道瓜侯已白頭。

以上雪舟勝豪

孫銳

銳字穎叔，吳江人。咸淳七年舉于鄉，宋亡隱居。

平望之桑磐村有耕閑先生集。

漁父詞

平湖千頃浪花飛
春後銀魚霜更肥
菱葉飯蘆花衣酒
酣載月忙呼歸

石湖別墅

山水遙通西渡頭
亂雲零落樹還稠
先生唱罷村田樂
戴月披蓑理釣舟

荻塘柳影

日出烟銷春晝遲
柳條無力萬絲垂
韶光新染鵝黃色

偏愛東風款款吹

以工耕閒先生集


龔 澹

澹字深父高郵人徙吳官司農卿宋亡隨例北
行至莘縣不食卒子璠入元為江浙儒學副提
舉有存悔齋集

劍池橋梁久就傾圮方丈雷公大禪師挺出新意
刊石伐木以遞汲且併陳樓悉改舊觀試下轉語
請師舉似石侍者冑一點頭不

涓涓劔池泉削崖出石乳流傳歲千百評列品三五興
梁見何時樓與姓俱古坐令丘壑觀凜作巖牆懼霑公
大勇猛咄嗟見未覩敬傾變畧約岵岵移朽腐連筒稱
深汲惠澤徧下土幽尋穩登眺清意逼肺腑何須鐵作
限只爾天可補傳聞橋下雲已作前山雨

虎丘志



宋詩紀事卷七十五

欽定四庫全書

集部

宋詩紀事卷七十六

詳校官監察御史臣李陽樾

侍讀臣孫球覆勘

總校官進士臣繆琪

校對官中書臣朱斲

謄錄監生臣李學瞻

欽定四庫全書

宋詩紀事卷七十六

錢塘厲鶚撰

馮坦

坦字伯田號秀石普州安岳人兩魁浙漕咸淳
辛未推恩任渝之江津夾漈務西總之龍灣酒

庫

絕句

山腰一抹雲雲起知何處急渡小橋尋天風忽吹去

鷓鴣源樵歌

綺羅巷陌總成塵誰識擔柴老買臣
自笑賣柴元似舊
買柴換卻舊時人

句

飄風驚日月落葉滿乾坤

呈吳履齋

并在丹誰煉碑殘墨欲

枯虛山白鶴觀

因聽敲竹雨便碎賞花心

鷗趁湍流下魚

巖石罅間

洞虛澗水

每向宋清求善藥聞從詹尹卜新年

燈影照殘孤枕夢雨聲滴碎兩年心

除夕桐江集

以上方回

劉應鳳

應鳳字堯舉號書臺安福人咸淳中登第授建

康軍簽判入元不仕

王炎午吾汶橐云堯舉聞文山再執北行有句
云天留中子墳孤竹誰向西山飯伯夷予問其
下句曰伯夷久不死必有飯之者矣案堯舉與
炎午均為未識文山之心者然其志亦可尚矣

聞文文山北行

喚得嵐鄉昨夢回東風萬里上金臺出關曾解娑娑否

枝北枝南一種梅

四朝詩

龔孟巖

孟巖字龍友臨川人咸淳對策中第仕終儒林

郎

送孟和卿平陽尋母

杜羔念母心最苦豈意一朝逢澤潞母驚兒貌似乃翁
兒抱母啼淚如雨五十孺慕朱壽昌刺血寫經毛髮蒼
閒關同州晚相見迎侍親輿歸故鄉人生百年一彈指
母恩未報情曷已團團尊前舞綵衣大勝世間朱與紫

子行萬里涉風沙誓不見母不還家兒今髮落母應老
道傍看者還咨嗟臨川孟氏號雍睦家世來此澶淵族
婆婆老慕紫荆花料想春風依舊綠

四朝詩

李謹思

謹思字明道號養吾餘干人咸淳中試禮部釋
褐第一入元卒

題文丞相吟嘯集

南人不識兩膝貴由摺百態卑且勞斯人護膝不護頭

故以頸血霑君刀蟠冑孤憤擘不碎殺氣千丈纏旌旄
援桴親鼓盡南海背水更用蜚丁鑿俘來吮血語神語
咄咄向與天爭豪湏臾赤日減顏色玄雲莽莽風颼颼
或言巨靈收拾付真宰讀罷拊臆生長號又言豐隆列
缺對愁絕疾指玉鞭鞭六鼇雨瓢倒翻水怪舞斗樞橫
軋天籟號憐伊肝膽苦復苦亦見曩昔真離騷劫灰滿
地莫挂眼蓬萊雖遠容輕舸長驅厲鬼尚堪戰儘閒未
許飛仙遨乃言興廢在爾不吾與吾死吾主吾焉逃魯

叟聞言拍手笑斯人六經為骨為皮毛斯人捲取六經
去空將贗本傳兒曹

吳禮部詩話

補疎齋題鵝湖

客來誰與期微鍾度山椒松風如起予間以笙與簫逸
響諒斯存幽蹤莽難招

天下同文集

贈李節婦

粹粹多羝屈幽幽獨雉經借渠施粉黛聊與照丹青孤
檣何年寄重泉底處有人能縮地不隔短長亭

郭天錫詩文雜記謝疊山字君直妻李節婦以君直故與二子繫金陵獄一將官欲納之李紿曰爾能脫我械繫乃可議此將以為然禱工下釋其獄李即具湯沐約翼日出是夕伺二子熟寐解衣帶自經死橐葬城東塚二子放還後數年子定之復往裹骨歸葬養吾李先生謹思贈云云

寄進士熊退齋

猶存火後書罕識卷中字無筆補玄經有金酬載記漫
漫歲月馳忽忽春秋閱欲辨已忘言涕淚空垂泗
殉義若殉財避名如避箭况當喜懼交宵與寵辱踐百

年元亮心一日宣明面朱門轍跡多山路微如綫

四朝詩

董師謙

師謙號南江三山人咸淳辛未別院省試魁仕

為平江府教官

錢塘懷古

歷歷庚申事分明在眼前講和如有弊飛渡定無船北
使三千里真州十四年釀成亡國恨一部福華編

玉牀搖帝座青蓋出都城巷哭千家淚燕歌四面聲乾

坤遽如許風雪可憐生清曉宮門外猶聽打六更

衣帶一條水靴尖三百州市朝陳迹在圖籍別人收南
渡衣冠盡西湖歌舞休久知事當爾曾記五更頭

行人指新寺云此舊宮城坐殿幾朝帝開山何處僧日
邊行塔影天外送鐘聲王氣元無了何消鑿秣陵

翰墨
大全

俞德鄰

德鄰字宗大號太玉山人永嘉人徙居京口舉
咸淳癸酉進士入元不仕有佩韋齋集佩韋齋

輯聞

過釣臺

行色苦迢遞人烟渺淒涼泊舟值嚴瀨濯纓感滄浪赤
符識龍鬪白水瞻鳳翔涼風協元德落星隱寒芒桑溟
忽變易草木猶芬芳嗟予邁屯蹇垂老悲興亡溪湍兀
小艇嵐氣昏戰場安得釣臺釣尚友狂奴狂

題白廷玉所藏白馬圖

八尺龍駒蹄削玉霜毛雪鬣超凡俗驕嘶顧影食場苗

朝暮逍遙在空谷詔書欵下徵騏驎香街紫陌驚人
金環壓轡出天廐不數馭駱驪駟三品豆芻飽終日
終日不鳴鳴輒黜何如不繫亦不維騰霧籟雲全玉質

秋日客中

楓落秋江塞雁賓客懷依舊憶鱸尊百年三萬六千日
半世東西南北人滿目空村爭虎豹何時高閣繪麒麟
由來管葛皆天意霄漢泥塗任此身

書齋

寂寂書齋萬慮空
恍然赤甲古城東
烏呼幽夢日方午
花惱醉吟春正中
軍將送茶驚諫議
門生載酒過揚雄
飛詩識字皆為累
間殺江頭獨釣翁

登六和塔

僧舍倚松北浮圖界竹
西江通巖瀨
遠雲壓越山
低槐里三原
隔襄城七聖迷
臨風悲往事
月落凍烏啼

老病

老病幽棲覺嬾吟
眼觀時態獨關心
古今不泯春秋筆

天地難欺暮夜金幸有別腸堪貯酒未愁短髮不勝簪
柴門一閉從春盡桃李飛花葉又陰

淮安天慶觀夜坐

邊城寂寞歲將闌濁酒頻斟醉不歡一點青燈霜月白
野鳧風起石窗寒

以上佩章齋集

宋慶之

慶之字元積一字希仁永嘉人咸淳進士有飲

冰詩集

劉後村跋云含蓄有餘思要是世間好詩

戍婦詞

君去無還期妾思無已時軍中無女子誰為補征衣

後村

題跋

開爐日賦

筋力已非舊逢寒亦自憐風霜在簷外妻子語燈前紙
被添新絮茶甌煮細泉雖云方寸地春意一陶然

項園即事

時節飛花盡幽林亦自香閒來看新水獨立又斜陽簷
角鳥鳴霽樹根魚就涼一春風雨過遊事極相妨

寓武昌報恩寺

孟宗祠下竹依然借得空房竹樹邊貧寺少逢僧過夏
遠鄉多是客經年倩人汲水時煎茗就佛分燈夜照眠
家信不來心欲斷明朝又買漢陽船

以上東甌詩集

句

城中豈云隘我見無夷途所以龐德公車不向此驅斜

陽挂林杪野花續春餘和陶數年何處客昨夜獨歸船喜弟

歸飄泊

知何處艱難亦到僧

送僧

更長初過雁蟄後稍無

蒼

旅夜

多年翁仲在寒食子孫稀

廢墓

以上村題跋

吳錫疇

錫疇字元倫休寧人做諸孫咸淳間南康守葉
閻聘為白鹿洞書院堂長不赴有蘭皋集

春望

春事今如此憑高興未闌半簾踈雨過一院落花閒草

色迷幽徑禽聲出晚山東風能育物不改鬢毛斑

春日

韶光大半去
怱怱幾許幽情遞
不通燕未成家寒食雨
人如中酒落花風
一窗草逆瀟溪老
五畝園私凍水翁
無賦招魂難獨笑
且排春句答春工

方岳跋云予嘗于何人卷中見左史公稱說著
梅花定說君之句不知其竹洲後人也意王愷
之珊瑚扶疎二尺美止此矣比吳君過予崖下
出其寶則三四尺六七株如燕未成家寒食雨
人如中酒落花風者尚多也子其秘之母使豆
粥韭齋為帳下兒所賣彼愷輩那得與君爭長

寶祐甲寅十月既望秋崖方岳拜手

林和靖墓

遺橐曾無封禪文
鶴歸何處認孤墳
清風千載梅花共
說著梅花定說君

山中雜言

小小柴門傍竹開
幽深不慣有人來
頗嫌老鶴無情思
啄損庭前一徑苔

山居寂寥與世如隔
是非不到榮辱兩忘
因憶秋

崖工部嘗教以我愛山居好十首追次其韻聊寫

窮山之趣 存四首

我愛山居好 蔬畦間蔣花
覓泉歸爨舍 篝火乞鄰家
出嫩貓頭笋 焙芳雀舌茶
野人曾拜號 何用給黃麻

我愛山居好 荒磯一釣竿
白鷗春水濶 黃犢綠坡寬
徑菊香秋晚 溪梅報歲寒
人間幽意足 詩思倚闌干

我愛山居好 枌榆老故丘
好峯當戶立 遠水護田流
鼓響移秧日 犂鳴穫稻秋
年豐身老健 一飽外無求

楊花

為見春風不久歸
顛狂上下弄晴暉
只饒天與無拘束
入幕穿簾任意飛

以上蘭皋集

汪若楫

若楫字作舟休
寧人官宣城
今咸淳間為紫陽
書院山長有秀山集

絕句

萬木驚秋各自殘
蜚聲扶砌訴新寒
西風不是吹黃落

要放青山與客看

新安文獻志

尤冰寮

冰寮錫山人
袁曾孫咸淳中官新安別駕有扣

角吟

句

三條椽下歸空榻
百尺樓中透遠峰
晚鐘蟻返愁尋穴
鴉

歸喜見巢

落葉

方回桐江集

宋自遜

自遜字謙父金華人自適弟號壺山居士

瀛奎律髓慶元嘉定以來乃有詩人為謁客者
干求一二要路之書謂之潤區副以詩篇動獲
千萬緡如壺山宋謙父一謁賈似道獲楮幣二
十萬以造華居是也錢塘湖山此曹什伯為羣
阮梅峯秀實林可山洪孫花翁季蕃高菊磻九
萬徃徃雌黃士大夫口吻可畏

五月菊

東籬千古屬重陽此本偏宜夏日長會得淵明高臥意

故來同占北窗涼

後村千家詩

一室

一室冷如冰梅花相對清殘年日易晚夾雪雨難晴身
計繭千緒世紛綦一枰麴生差解事談笑破愁城

瀛奎律髓

阮秀實

秀實號梅峯興化軍人早見知于趙昌甫僑居
吳門游賈秋壑之門最久人號阮怪咸淳初攝

蕪湖茶局

孟享仰瞻聖駕

紫烟斂翠碧天長柳陰旌旗午尚霜一朵彩雲擎瑞日

光華盡在舜衣裳

景靈宮恭謝駕回丞相以下皆簪花

宮花密映帽簷新
誤疑蜂逐去塵自是近臣偏得賜
繡鞍扶上不勝春

以工隨隱漫錄

鄧克中

景靈宮恭謝駕回丞相以下皆簪花

輦路春風錦繡張
裁紅剪綠鬪芬芳
黃羅傘底瞻天表

萬疊明霞捧太陽

隨隱漫錄

歐陽慶甫

慶甫咸淳中道州處士

白魯井石刻詩

地僻人稀能幾家
清泉漱玉石敲斜
客來訪我慙無具
洗甌炊香更點茶

永州府志

牟 巖

巖字獻之其先蜀人徙居湖州端明學士子才之子擢進士官至大理少卿宋亡時獻之已退

不任事與子應龍一門父子自為師友討論經
學以義理相切磋應龍遂以文章大家見推于
東南獻之有陵陽集

東坡九日尊俎蕭然有懷宜興高安諸子姪和淵
明貧士七首余今歲重九有酒無肴而長兒在宜
興諸兒蘇杭溧陽因輒繼和

驚飈舉落葉意氣何軒軒秋高百卉盡寂寞但空園何
異富與貴變滅隨雲烟緬衆陶彭澤平生極幾研朗吟

貧士詩相對如晤言今人之所恥古人以為賢

翁媪共白髮蕭然老江干大兒荆溪游折腰豈為官諸
兒走異縣亦各營一餐別多會面少端復坐飢寒諸幼
且眼前笑語開我顏勿問賢與愚懷抱俱相關

好惡皆不察鑿垣植蒿蓬而比庭前菊鋤灌少人工此
物抱至潔有似楚兩龔留香待嚴凜意與烈士同冀土
笑伯始金錢鄙鄙通千載一元亮舍此安將從

送婁伯高游吳

桃花水暖清明前長堤柳色青如烟
男兒年少重意氣
春風買醉吳江船
西湖三月春更好
笙歌錦繡神仙島
紫燕樓深翠黛閒
碧羅天淨楊花老
興亡往事置勿論
千金不惜酹歌尊
酒酣莫作後庭曲
游人思斷江南魂
去去知君訪陳迹
吳山吳水青歷歷
花殘鈿碎館娃空
春草年年為誰碧
君行正樂我為愁
白髮送君思舊遊
平生漫浪無似我
努力功名須黑頭

贈厲白雲上人

雙徑聞鐘罷而今但熟眠事須紅日上身在白雲邊古
貌應違俗高吟不礙禪爐頭煨芋火相對各欣然

和雨中

但聽四簷滴真成萬事休空村就誰飯高樹繫吾舟那
忍田翁笑還憐木偶流老人渾忘事畧記酉年秋

四安道中所見

蒼涼初日破林霏幾度言歸不得歸兀兀籃輿續殘夢
門前兒女挽人衣

以上陵陽集

家鉉翁

鉉翁號則堂眉州人以廕補官賜進士出身歷
端明殿學士簽書樞密院事元兵至杭以參知
政事介丞相吳堅等充祈請從畱燕宋亡守志
不仕改館河間至成宗即位放還賜號處士以
壽終

寄江南故人

曾向錢唐住聞鶻憶蜀鄉不知今夕夢到蜀到錢唐

天

間集

寄洞霄道友清溪翁

漢家中郎年七十霜鬢垂垂人不識冬深破屨踏層冰
暑到露頭走赤日窮堅老壯本分事百年未死為形役
洞天九鎖鬱嵯峨古來相傳神仙宅我嘗結茅天柱前
屐齒蒼苔印行跡劫火洞然城郭非清境不壞還如昔
安期羨門我輩人圓嶠方壺一咫尺夢魂幾度如相逢
別來已久知相憶願分仙家九轉丹服之身輕生羽翼

周遊八表任去來跳出陰陽寒暑域

洞霄詩集

九日登瀛臺

此地無山喜有臺南瞻北眺兩宜哉
衰翁無事日傾倒
佳客何人時一來孤鶴飛鳴知我在
征鴻嘹唳為誰哀
老來萬事如歸宿不為憂愁強把杯

河間府志

李珣

珣字元暉號鶴田又號廬陵民吉水人年十二
通書經詔試館職除秘書省正字批差充幹辦

御前翰林司主管御覽書籍除閣門宣贊舍人
宋亡後不出年八十九而終有雜著四集錢塘

百詠行于世

劉詵桂隱集題李鶴田穆陵大事記後云宋自
穆陵升遐元氣盡矣時攢官屬官李珣記其本
末頗詳橋山劍舄歷歷如見異代覽之亦為淒
然因用鶴田先生昔陵下元夕韻以識感慨云
陵寢嵬峩十二闌西興吹角浙江寒老臣無限
遺弓淚寫與人間異代看

南郊紀事

嚴更頻報夜何其萬甲聲傳遠近隨
梔子燈前紅炯炯

大安輦上赴壇時

武林舊事

題汪水雲湖山類豪

天地事如許英雄鬢已斑
淚添東海水愁壓北邙山
湖山類豪附

雪中寄友

石角雲層道路難
黑風三日晝漫漫
吟筇直指西湖柳
合與梅花共此寒

皇元風雅

題王右丞輞川圖

園圖親畫早流傳，已是人間五百年。
凝碧池頭秋句在，當年幾負此林泉。

珊瑚網

題宗元觀

舟維楊柳岸來，拜晉英靈碑古。
龍紋暗，劔寒蛟血腥。江春半，
篙綠山曉。一樓青燈火，旌陽殿鐘聲。
過客聽。

四朝詩

句

此水自當兵十萬，昔人曾有客三千。

梅磡詩話江陰乃春中舊封浮遠堂瞰江對淮
為一郡佳境李鶴田一聯云云人多傳誦

陳世崇

世崇字伯仁崇仁人

一作臨川

郁子隨父入宮禁仍

充東宮講堂說書兼兩宮撰述後任皇城司檢
法賈似道忌之遂歸于鄉入元著隨隱漫錄多
述宋季事

題曾氏諸帖

南豐而後艇齋君忠義詞章萃一門手澤流芳凌劫火

欽承猶得到來孫

鐵網珊瑚

呂三餘

三餘號雪屋

賀陳隨隱以布衣除東宮掌書

青宮樓觀近堯階
班列屏風間坐開
人羨杜閒生杜甫
天教蘇頲繼蘇瓌
馬歸禁苑行邊柳
鶴伴平山隱處梅
我恨長鑱斲黃獨
老年無計策衰頹

隨隱漫錄

柳桂孫

桂孫號月磻

賀陳隨隱以布衣除東宮掌書

鏤玉裁冰字字奇，少年親結九重知。
君臣際遇榮千載，父子推敲冠一時。
壘進楚蘭春奏雅，瓶分陶菊夜聯詩。
五雲樓近開黃道，金紫連班進赤墀。

隨隱漫錄

劉彥朝

彥朝字雷厓

贈陳隨隱

坎止流行只任天，吟廬新傍紫薇邊。
夜窗低過宮花月

曉巷深橫御柳烟五字冑同餘子說一燈親自乃翁傳
雖然不作功名念卻恐功名逼少年

隨隱漫錄

張彝

彝號溪居

贈陳隨隱歸江西

醞藉中涵廊廟姿詩文都好見宸批只蒙四字君王寵
蟻蝨微臣不用題

隨隱漫錄

吳石翁

石翁字一齋

贈陳隨隱

大隱君家小隱君得名大半忌人聞
秋窗吟共縱山月曉榻眠分華嶽雲
鶯欲引雛先出谷馬纔生驥便離羣
新詩卻要多拈出突過郎罷張我軍

隨隱漫錄

杜汝能

汝能字叔謙號北山太后諸孫居西湖之麴院

有能詩聲

秋日

寂寥籬戶入泉聲
不見山容亦自清
數日雨晴秋草長

絲瓜沿上瓦牆生

全芳備祖

贈陳隨隱

父子名相繼如君
又出奇乾坤鍾秀氣
湖海誦新詩放
鶴春風遠橫琴
夜月遲未應隨大隱
間過聖明時

隨隱漫錄

黃力叙

力叙號梅堂江西人

贈陳隨隱歸江西

詩在天地間風清月明處若為深閉門而可覓佳句夫
君小元龍豪氣隘區宇青春發詩材秀茁長膏雨流水
與行雲吾不見滯住乘月滌吟毫玉椀三危露超詣自
透脫悟在觀劍舞入宮畫蛾眉胡為衆女妒君詩亦何
憾千載一時遇向也詩道昌吟聲喧禁籟應制沉香亭
龍中曾拭唾今焉詩道厄短筇策江路悲嘯梁父吟侘
傺離騷賦浮雲時卷舒睨此知出處此其隨之義大隱

會境趣天地梅又春風緊雪飛絮一笠灞橋驢吟詩向
臨汝得句從人傳傳今亦傳古要知是家傳審言以傳
甫傳之而又傳衣鉢傳宗武

隨隱漫錄

黃鵬飛

鵬飛字桂隱莆田人

送陳隨隱游廬山

天下廬山第一奇西風楚楚送行時
晦菴白鹿書猶在
非是游山只愛詩

曾從圖畫識廬山山好誰知畫亦難畫好不如詩好讀
就煩詩筆畫來看

虞德觀

德觀亡其名蜀郡人

句

我因國破家何在君為脣亡齒亦寒

虞集道園遺稿云從兄德觀父與集同出榮州府君宋亡隱居不仕而歿集來吳門得兄遺蹟有句云云不知為誰作也

宋詩紀事卷七十六